

【经文信息】大正藏第 12 册 No. 0335

佛说须摩提菩萨经 1 卷

No. 335 [Nos. 310(30), 334, 336]

佛说须摩提菩萨经

姚秦三藏鸠摩罗什译

闻如是：

一时佛在罗阅祇耆闍崛山中，与大比丘众千二百五十人、菩萨万人俱。

尔时罗阅祇大国有长者，号曰优迦。优迦有女，名须摩提，厥年八岁，历世奉敬过去无数百千诸佛，积累功德不可胜计。时须摩提，从罗阅祇大国出诣耆闍崛山，行到佛所前，以头面稽首佛足，礼毕即却在一面，以一心而往，叉手白佛：「愿欲有所问，唯多陀竭以方便解脱我之所疑。」

时佛默然，即知女意。佛语须摩提：「恣所欲问，多陀竭今当为汝具解说之，事事分别，令汝欢喜。」

须摩提问佛言：「菩萨云何所生人见之常欢喜？云何得大富，有常多财宝？云何不为他人之所别离？云何不在母人腹中，常得化生千叶莲华中，立法王前？云何得神足，从不可计亿刹土去到彼问礼事诸佛？云何得无仇怨、无侵嫉者？云何所说语言，闻者信从，踊跃受行？云何得无殃罪，所作善行无能坏者？云何魔不能得其便？云何临寿终时，佛在前立为说经法，即令不堕苦痛之处？所问如是。」

是时佛语须摩提：「如汝所问多陀竭义，善哉！大快！乃如是乎？汝若欲闻，谛听谛受，勤思念之！吾当解说。」

时女即言：「甚善，世尊！愿乐欲闻。」于是须摩提受教而听。

佛言：「菩萨有四事法，人见之皆欢喜。何等为四？一者、瞋恚不起，视怨家如善知识。二者、常有慈心向于一切。三者、常行求索无上要法。四者、作佛形像。是为四法。菩萨用是事故，人见之常欢喜。」

佛于是说偈言：

「不起恚毁本根， 常行慈得要法，
作佛像身好洁， 心欢喜人喜见。」

佛语须摩提：「菩萨复有四事法，得大富有。何等为四？一者、布施以时。二者、与己倍悦。三者、与后不复悔。四者、既与不求其报。是为四事。菩萨用是四事故，得大富有。」

佛于是说偈言：

「以时施无悔心， 喜悦与无悋望，
所作施有勇慧， 在所处常大富。」

佛语须摩提：「菩萨复有四事法，不为他人之所别离。何等为四？一者、不传恶说鬪乱彼此。二者、导愚冥者使入佛道。三者、若有毁败正法，护使不绝。四者、劝勉诸人教使求佛，令坚不动。是为四法。菩萨用是四事故，不为他人之所别离。」

佛于是说偈言：

「不传说鬪彼此， 导愚冥护正法，
劝进人使求佛， 终无能别离者。」

佛语须摩提：「菩萨复有四事法，得化生千叶莲华中立法王前。何等为四？一者、细捣优钵华、波昙华、拘文华、分陀利华，令此四种末之如尘，使满勺虫，持是供养世尊、若塔及舍利。二者、不令他人起恚意。三者、作佛像使坐莲华上。四者、得最上觉便欢喜住。是为四法。菩萨用是四事故，化生千叶莲华中立法王前。」

佛于是说偈言：

「施四华满句虫， 除恚恨受法义，
得上觉立佛前， 作形像生华中。」

佛语须摩提：「菩萨复有四事法得神足，从一佛国至一佛国。何等为四？一者、见人作功德不行断绝。二者、见人说法而不中止。三者、常然灯火于塔寺中。四者、求三昧。是为四法。菩萨用是四事故，得神足，从一佛国复至一佛国。」

佛于是说偈言：

「行功德为法施， 闻经说不中止，
常然灯于佛寺， 入三昧遍诸国。」

佛语须摩提：「菩萨复有四事法，得无仇怨、无侵嫉者。何等为四？一者、于善知识无谗谄心。二者、不悭惜贪他人财物。三者、见人布施助其喜。四者、见菩萨诸所作为不诽谤。是为四法。菩萨用是四事故，常行是行，得无仇怨、无侵嫉者。」

佛于是说偈言：

「于善友无谗谄， 不悭惜他人物，
见人施助其喜， 行菩萨无仇怨。」

佛语须摩提：「菩萨复有四事法，其所语言，闻者信从踊跃受行。何等为四？一者、口之所说心亦无异。二者、于善知识常有至诚。三者、闻人说法不言是非。四者、若见他人，请令说经不求其短。是为四法。菩萨用是四事故，其所语言，闻者信从踊跃受行。」

佛于是说偈言：

「如所念言亦尔， 于善友有诚信，
闻讲法不求短， 若说经心喜踊。」

佛语须摩提：「菩萨复有四事法，得无殃罪，所作善行疾得净住。何等为四？一者、心意所念常志于善。二者、常持戒三昧智慧。三者、初发菩萨意，便起一切智，多所度脱。四者、常有大慈愍于一切。是为四法。菩萨用是四事故，得无殃罪疾得净住。」

佛于是说偈言：

「常志善念广度， 戒等定不离慧，
常教人一切智， 行慈意得净住。」

佛语须摩提：「菩萨复有四事法，魔不能得其便。何等为四？一者、常念于佛。二者、常精进。三者、常念经法。四者、常立功德。是为四法。菩萨用是四事，故魔不能得其便。」

佛于是说偈言：

「常喜意念于佛， 常精进在深法，
自勸勉立功德， 魔用是不得便。」

佛语须摩提：「菩萨复有四事法，临寿终时，佛在前立为说经法，令不堕苦痛处。何等为四？一者、为一切人故，具满诸愿。二者、若人布施，诸不足者念欲足之。三者、见人杂施，若有短少便裨助之。四者、常念供养于三宝。是为四法。菩萨用是四事故，临寿终时，即见诸佛皆在前立为说经法，不令其人堕苦痛处。」

佛于是说偈言：

「为一切满所愿， 无极哀劝足檀，
以杂施致黠慧， 供三宝得致佛。」

尔时须摩提白佛言：「唯，世尊！所说四十事，我当奉行令不缺减，悉使具足不违一事。若失一事，我为断佛法灭众弟子。」

是时长老摩诃目干连在大会中坐，即问须摩提：「此四十事，大士所行菩萨所为，甚亦难当，如汝小女何能办之？」

时须摩提答目干连言：「假令我今审实能行此四十事者，三千大千国土皆当为我六反震动，雨于天华，诸音乐器不鼓自鸣。」

须摩提适发是言，应时三千大千国土六反震动，即雨天华、乐器即鸣。

女语目干连：「是证明我之至诚！若未来有起菩萨意者，亦当如是。我后亦当得多陀竭。阿罗诃。三耶三佛，信如我言，无有虚者，其在会者，皆当一等悉作金色。」

寻如所语，辄作金色。

于是目干连即从座起，正衣服下右膝叉手，为佛稽首作礼，前白佛言：「今诸一切初发大意为菩萨者，我当自归，为之作礼。所以者何？八岁女子感应如此，岂况高士摩诃萨乎？」

是时座中有大菩萨名文殊师利，谓须摩提言：「于何法住，所现感应乃如是乎？」

须摩提答言：「诸法不可计数亦无所住，而仁问我住于何法？仁作是问，不如不问。」

文殊师利问须摩提言：「此语云何，乃至于斯乎？」

须摩提报文殊师利言：「不于诸法有所住，亦无所疑，亦不言是非。」

文殊师利问须摩提言：「如来本不作行乎？」

须摩提报言：「譬如月影现于水中，若梦、野马、深山之响，如来本行亦如是也。」

文殊师利问须摩提：「如仁所说，合会是事为能得佛不？」

须摩提报言：「云何，仁者！谓痴黠行三事异乎？不为异也，一切一法，诸法皆合。所以者何？若正法若不正法，适无所住亦无所取，亦无所收，空无有色。」

文殊师利复问须摩提：「解是义者为有几人？」

须摩提报言：「夫作幻者，恣意作化，宁有限无？幻师所化犹尚无限，信解此法亦如是也。」

文殊师利问须摩提言：「如我无化无幻，起行何法而与道合？」

须摩提报言：「如仁所说，致为大快。一切法处亦不有亦不无，至于如来无合无散。」

文殊师利闻彼所说，甚悦赞善。文殊师利前白佛言：「甚善！须摩提所说自恣其意微妙，大可怪也！乃能深入逮得法忍，发意已来为几何乎？」

佛语文殊师利：「是须摩提，发阿耨多罗三耶三菩心，等住已来积不可计，先仁之前三十亿劫，仁乃于彼发无上平等度意，适乃甫入无所从生法忍，是仁本造发意时师也。」

文殊师利闻佛所言，则前作礼，白须摩提：「惟别久远，今乃讲侍，与师相见得受法诲。」

须摩提报言：「莫作是念。用何等故？无所从生法忍，亦无所念亦无有师。」

文殊师利问言：「云何不转女人身？」

须摩提报言：「于是无所得。所以者何？法无男无女，今者我当断仁所疑。」

文殊师利言：「善哉！乐欲闻之。」

须摩提谓文殊师利言：「如今我后不久，亦当逮得如来。无所著。等正觉。成慧行。安定世间父。无上士。道法御。天人师。佛。天中天，如是审谛，我今便当变为男子。」适作是语，即成男子，头发即堕，袈裟在身，便作沙弥。

须摩提复谓文殊师利言：「审我来世当作佛时，使我国中莫有三事。何等为三？一者、魔事。二者、泥犁。三者、女人态。若我志诚，我身当如年三十沙门。」时须摩提适作是语，形体颜色如年三十。

须摩提复谓文殊师利言：「我作佛时，令我国人皆作金色，地及城郭周匝有七宝树，令八重行七宝池水，四边中外皆生七宝杂色莲华及诸杂宝，不多不少皆悉停等。」

须摩提言：「如仁之国，我之刹土亦当如是。如我志诚，诸在会者当作金色。」适作是语，应时众会皆作金色。

时持地神即从地出，化作天身，举声称扬叹须摩提言：「须摩提菩萨摩诃萨得作佛时，国土所有七宝池水、树及华实，皆当如是。」

于是佛谓文殊师利：「是须摩提菩萨摩诃萨，不久当得作佛，字名远闻具足藏如来。过四道不受。平等觉，兴具足行，安隐世间，天上天下无上大人。女意云何？法无所住，岂有我名乎？」

答曰：「不也，天中天！」

「于女意云何？其幻化者，岂有到后世复来者乎？」

答曰：「不也，天中天！」

「于女意云何？其幻化者，岂有所起所灭乎？」

答曰：「不也，天中天！」

「于女意云何？其幻化者，岂有所有有形像乎？」

答曰：「不也，天中天！」

「于女意云何？其幻化者，岂有见闻有幻无幻乎？」

答曰：「不也，天中天！」

其女曰：「佛言我曾闻之，其幻化者，无有见闻、有幻无幻。」

世尊又问：「于女意云何？其幻化者假使无身，岂能令幻化发起诸行乎？」

女答曰：「唯，天中天！其幻化者，实为如此，真无所有。」

佛言：「如是！其无明者，无内无外。计其法者，亦无所有、亦无字也。其明者，不至后世亦无还反。其无明者，亦无有起亦无有灭。其无明者，亦无形像。适兴无明，缘致众行、名色、六入，更习痛、爱、受、有、生老病死，勤苦愁恼大患集会。」

明女首意白佛言：「甚为可奇，至未曾有，世尊所兴而不可及。所以者何？佛天中天，于虚空中而转法轮。法轮不可思议，所转法轮不可称限，无量法轮、无获法轮、无形法轮、无生法轮、灭度法轮。」

世尊告曰：「如是，如是！诚如所云。吾所转轮为转空轮，所转法轮不可思议，所转法轮不可称限。其可转轮，无获、无形、无生，为灭度也。」

时首意女欢喜踊跃，善心生焉。则以栴檀香捣及诸华香供养散佛：「唯然，世尊！以是德本深致拥护，而善救摄降伏诸根，抑制爱欲速转法轮，转于空轮、不思议轮、不可称限无量无获无形无生灭度之轮。」

佛寻欣笑，五色——青、赤、黄、白、绿——光从口而出，甚大光明，普照十方无数佛国，悉皆覆蔽日月之明，还绕佛身三匝从顶上入。

贤者阿难，晓了七法——一曰、知谊，二曰、解法，三曰、晓时，四曰、了节，五曰、明众，六曰、练己，七曰、深识人本——即从座起，更整衣服，偏袒右肩，下右膝，叉手白佛：「今大圣欣笑，为何感应？愿说其意。唯，天中天！多所愍伤，多所安隐，哀念诸天世间人民，分别说之。」

佛告阿难：「尔见梵志女首意以末栴檀华香捣香，供养散佛乎？其心誓愿速转法轮。」

对曰：「已见。」

佛言：「是女以斯德本，护己安人、多所救摄，寿终之后当转女身，至八十四亿劫不归恶趣，供养六万诸佛世尊，出家为道志于沙门，听受经法。受经法已实时讽诵，将御如来现在正法，佛灭度后供养舍利，劝化无数无量众生不可计会，使立无上正真之道，恒以善意奉持要法，号天中天。」

佛说是经授须摩提菝时，三十亿人发无上平等度意，皆得阿惟越致；六万天子悉得法法眼生。

座中有五百菩萨，闻文殊师利所问甚深，意用不解，中欲堕落，见须摩提所说至诚，寻皆有应，即解身衣以用上佛，亦不谄谀、无所悵望，持功德用，自坚固于无上平等度意，即得住阿惟越致，超九十劫不复生死。时佛授与五百人决，却后十劫，劫名无尘垢，佛号固受如来。过四道不受。平等觉。是

五百人等当生彼国，国名焰气，当同一劫俱得作佛，皆同一字，号庄饰豫知人意如来。过四道不受。平等之道最正觉。

佛谓文殊师利：「乃知是经多所饶益，如是不乎？若今最后有菩萨摩訶萨及沙门，若善男子、善女人等，求菩萨道，奉行六波罗蜜，未晓沤和拘舍罗，不如书持是经讽诵读转，复教人常念其中事，诸欲闻者广为解说。」

佛复语文殊师利：「前所不闻、本所不行，如是等辈菩萨者，当念习持。所以者何？譬如遮迦越王治于世时，至竟七宝不为缺减，其王寿终七宝为散。如是，文殊师利！若佛经道住于世者，佛七觉意终不为减。若佛法灭，觉意诸法皆为乏尽。」

佛谓文殊师利：「当求无数方便具索诸经，勤学书持为他人说，教授一切广解其义，常当精进是为法教。善男子、善女人欲求佛道者，莫中有悔。」

佛说经已，须摩提菩萨、文殊师利菩萨、摩訶目干连等，诸天及人，其在会者，阿须罗、捷沓和、持世者，皆欢喜乐闻。

佛说须摩提菩萨经

【经文信息】大正藏第 12 册 No. 0335 佛说须摩提菩萨经

【版本记录】CBETA 电子佛典 Rev. 1.16 (Big5)，完成日期：2010/11/10

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供，CBETA 自行扫描辨识，西莲净苑提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
